

**Naaja H. Nathanielsen
Attaviitsoq**

UPA2016/101.1
15. april 2016

Inatsisartut inatsisaat nr. xx ulloq xx. xxx 2016 uumassusillit sananeqaataasigut kingornuttagaasunik isumalluutit tamatumunngalu atatillugu suliniutit pillugit.
(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

Aallaqqaasiutigalugu oqaatigisariaqarpara inatsisissatut siunnersuutaasunut tamanut tusarniariaatsit ernummatigigakkit. Manna tikillugu inatsisissatut siunnersuuterpalussuit atuareerpakka, taakkununngalu atatillugit aamma tusarniaanernut akissuterpaalussuit aamma atuareerlugit. Tunngaviumik isumagaara tusarniaanerit tassaasartut inatsisissatut siunnersuutaasunut pitsanngorsaait. Tusarnianerit inatsimmit attorneqartussat sammineqartumi ilisimasaqarluartut aperineqartarput. Takussaaqaarli tusarniarfigisanit isornartorsiunerit allannguutissatullu siunnersuutit itigartinneqartut. Tamannalu siunertaagunangilaq tusarniaanerit?

Una siunnersuut eqqarsaatigilluaqqissaartariaqarpoq. Inatsisissatut siunnersuutaasooq sunniuteqartupilussuussaaq. Tamanna aamma erserpoq tusarniaanerit akissuteqaatinit. Inatsisissatullu siunnersuummut akissuteqaatit nersualaarinninnerinnaangivipput. Akissuteqaatini ersarilluinnarpoq sammineqartumi ersarinngitsaqarpallaartoq. Eqqarsaqajaanaarpoq Namminersorlutik Oqartussaniit suliamut ilisimasaqarneq naammaginangitsooq. Namminersornerullutik Oqartussanik isornartorsiunerunngilaq-sammineqartoq paasiuminaatsuuvoq nutaajullunilu. Tamannarpiarlu tunngavigalugu pingaaruteqarpoq isornartorsiunerit paasinissaat, tusarniaaffigisallu ilisimasaannik atuinissaq.

Kukkunerunngila Ilisimatusarfik tusarniaaffissanut ilaanngimmat?
Pissusissamisoorluinnassagaluarpooq, ingammik eqqarsaatigigaanni ilisimatusarnerit inatsisissatut siunnersuutigineqartumit attorneqartussaanerit. Eqqarsarnartorujussuuvoq Ilinniartitaanermut ilisimatusarnermullu naalakkersuisoqarfik tusarniaanermut akissuteqarsimangimmat.

Bioteknologimi immikkut ilisimasaliunngilanga soorlu aamma taakkununnga tunngatillugit atuinissamut periarfissat aamma immikkut ilisimasaqarfiginngikkikka. Kisianni inatsisissatut siunnersuutit pisariaqanngitsumik allaffissornermik pilersitsisut, nassuiarneqarnissartillu pissutigalugu paatsuungalersitsisut takugukkit, ilisarisinnaavakka. Inatsisissatullu siunnersuut una taamaattuuvooq. Ersarluttut amerlavallaqaat, taakkulu kingusinnerusukkat aatsaat Naalakkersuisunit ersarissarneqassapput. Sinakutsiilluni inatsisiliornermi tassa siunertarpiaavoq, sinaakkutissat qulaajarneqarsimanissaat. Taavami imaassinnaavoq inatsit sinaakkusiisoq sakkut pitsaanerpaartarinngikkaat, inuussutissarsiummik nutaamik ineriartortitsiniarnermi. Eqqarsaammernarpoq inatsisissatut siunnersuummi ilisimatusartunut inuussutissarsiortunullu piumasaqaaterpassuarnik pisussaaffiliimmat, Namminersorluni Oqartussanut pisussaaffilinngingajalluni. Inuussutissarsiornermut inoroorsaarnerunngilaq ilisimatusarnermullu siuarsaanani.

Soorunami pisinnaatitaaffigut qulakkiissavagut. Soorunami nunarput iluanaaruteqassaag ilisimatusarnermi angusaasunit, uumassusillit sananeqaataasigut kingornussaasunit pisuussutitsinnit inuussutissarsiornernikkut pilersinneqartumit soorunami iluanaaruteqassaagut. Kisianni nunatsinni immitsinnut pallittaalisaliuutissanngilagut pisariaqanngitsumillu ilisimatusarnermut inuussutissarsiutinillu ineriartortitsinissanut pisarissersuulluta.

Naaja H. Nathanielsen
Attaviitsoq

Siunnersuutigissavara inatsisissatut siunnersuut ataatsimiititaliamut ingerlateqqinneqassasoq, ataatsimiititaliallu qulakkiissagaa tusarniaaffigineqartut ernumassutaasa pimoorullugit iliuseqarfigineqarnissaat. Ataatsimiititaliaq allannguutissanik arlalinnik siunnersuuteqartariaqarpoq inatsisissatut siunnersuutip aappasaaniinnginnerani. tamanna sivirusumik ingerlattariaqarnissaa ilimanarpoq, taamaattumik innersuussutigineqassaaq aappasaaneernissaa aatsaat ukiukkut ingerlanneqassasoq.